



Schweizerische Eidgenossenschaft  
Confédération suisse  
Confederazione Svizzera  
Confederaziun svizra



## Давлатларо сув хўжалигини мувофиқлаштириш комиссиясининг илмий-ахборот маркази

Сирдарё-Сўх Ирригация тизимлари  
хавза бошқармаси

“Фермер хўжаликларида сувнинг маҳсулдорлигини ошириш”  
лойихаси

# Агромелиоратив бюллетең

Далада олиб бориладиган агротехник тадбирлар



Фарғона – 2010 йил

## **Март ойида амалга ошириладиган агротехник тадбирлар**

Март ойида об-хавонинг иссиқ кунларидан фойдаланиб, далаларда кўплаб агротехник тадбирларни амалга ошириш тақазо этилади. Шудгорланган далаларнинг ўрталарида қолиб кетган, столбалар ва иншоотлар атрофини техника ёки қўл кучи билан шудгорлаш, дала четларни чопиш, дала атрофларида хашорат ва зараркунандаларги қарши профилактика ишларини бажариш, тозаланмай қолиб кетган ариқ-зовурларни тозалаб охирига етказиш, кузги буғдойларни дастлабки озиқлантириш ва суғориш, далаларни текислаб чигит экишга тайёргарлик кўриш ва чигит экиш каби агротехник тадбирлар амалга оширилади. Шулардан бири ғаллани озиқлантиришдир.

### **Ғаллани озиқлантириш ва суғориш**

Майса парваришидаги энг муҳим тадбирлардан бири, бу ғаллани 1-озиқлантиришни сифатли ўтказишидир. Худудларни жойлашишига кўра озиқлантиришнинг тахминий муддати феврал ойининг учинчи ўн кунлигига тўғри келади. Бунда азотли ўғитлар йиллик меъёрининг 25 фоизини бериш зарур (физик ҳолда бир гектарига 150-160 кг дан).

Азотли озиқлантиришни энг аввало кеч экилиб, қишлоvdан қийинчилек билан чиқсан, кейин эса уруғлик учун етиштирилаётган ва ниҳоят қолган майдонларда ўтказилиши мақсадга мувофиқдир. Қишлоvга тупламасдан кирган ҳамда қишлоvдан қийин чиқсан майдонлардаги майсани қўшимча тартибда гектарига 100 кг дан азотли озиқлантириш яхши самара беради.

Шунда кўчат қалинлиги барқарорлашади. Тупланиш жараёни жадаллашади, 1 метр квадратда 550-600 тагача маҳсулдор поя ҳосил бўлади. Озиқлантиришни ўз муддатида ўтказиш ҳисобига ҳар гектар ердан 4-6 центнергача қўшимча ҳосил олишга эришилади.



Бу тадбирдан сўнг ҳар бир минтақанинг тупроқ ва иқлим шароитини хисобга олган ҳолда ғаллазорлар 700-800 куб метр меъёрида суғорилади. Суғориш жараёнида қўшимча озиқлантириш мақсадида жамғарилган маҳаллий ўғитнинг 60-70 фоизи шарбат усулида оқизилиши яхши самара беради.

Бу даврдаги озиқлантиришда навларнинг биологик хусусиятларига асосан эртапишарлигига (Чиллаки, Кума, Андижон-4, Бобур), ўртапишарлигига (Крошка, Нота,

Восторг, Таня, Купава, Краснодар-99) ва ўрта кечпишарлигига (Пловчанка, Уманка, Княжна) алохидә этибор бериш керак. Чунки эртапишар навлар бошқа навларга нисбатан 7-10 кун эрта найчалаш фазасига киради. Бу эса эртапишар навларни бошқа навларга нисбатан 10 кун эртароқ озиқлантиришни талаб этади.

Ойининг охирида агрономларнинг хулосаларига кўра, касаллик, заракунанда хашоратлар ва бегона ўтлардан кучли заарланган майдонлар аниқланишига алохидә этибор бериш керак.

Март ойининг муҳим тадбирларидан бири – бу ғалланинг 2-озиқлантириш ҳисобланади. Найчалаш фазасида ғалланинг эрта баҳорги ҳолатига нисбатан фарқи шундаки, бу пайтда ўсимликнинг вегетатив органлари, энг асосийси поялар сони кўпайган бўлади. Шу пайтда азотли ўғитлар йиллик меъёрнинг 40 фоизи, яъни физик ҳолатда ҳар гектарига 300-320 кг миқдорида берилади.

Найчалаш фазасида ғалланинг намлик ва озуқа моддалари билан таъминланиши муҳим аҳамиятга эга. Чунки бу даврда бошок найча ичидә шаклланади. Найчалаш фазасининг давомийлиги 25-30 кунни ташкил этади. Шу қисқа даврда буғдой ўсимлиги бутун ўсув давридаги қуруқ модданинг 50-60 фоизини тўплайди. Шунинг учун найчалаш даврида намлик ва озуқа моддалар етишмаслиги ҳосилдорликка салбий таъсир этади.

Буғдой майсаларининг ривожланиши суст бўлган майдонларга минерал ўғитлар суспензияси сепилиши ўсимликларни эрта баҳорги ривожланишини тезлаштиради. Бундай эритмани қўллаш учун ҳар гектар майдонга 300 литр миқдорида ишчи эритма тайёрланади. Эритма тайёрлашда физик ҳолда 45 кг карбомид, 12 кг аммофос, 6-8 кг калий олиниб, 300 литр сувда эритилади ва 60 даражада иссиқликда илитилади шундан сўнг маҳсус пуркагич ёрдамида пайкалларга сепилади. Суспензия сепишида майсалар ер устки қисмини тўла қоплаганлигига алохидә этибор бериш керак. Вилоятимиз ғаллачилиги тажрибасидан келиб чиқиб, шуни айтиш мумкинки, ғалла баргидан озиқлантирилганда ўсимлик барг сатҳи қалинлашади, касаллик ва зааркунандаларга чидамлилиги ортади, фотосинтез жараёни яхшиланади, пировардида ғалланинг ўсиши ва ривожланиши тезлашади. Шунинг учун ғаллани мавсумда 4-5 марта минерал ўғитлар суспензияси билан озиқлантириш тавсия этилади.

Ҳар бир минтақанинг тупрок ва иқлим шароитини ҳисобга олган ҳолда ғалла 800-1000 метр куб меъёрида сугорилади. Сугориш жараёнида маҳаллий ўғитларни шарбат сифатида оқизилиши мақсадга мувоғиқ бўлади.

Бегона ўтдан кучли заарланадиган ва иккинчи йил ғалла экилган майдонларга март ойининг учинчи ўн кунлигидан бошлаб мутахассислар тавсия этган гербицидлар ёрдамида дастлабки ишлов бериш бошланади. Гербицидлардан фойдаланиш кун иссиган пайтларда амалга оширилса, унинг фойдаси кўпроқ бўлади. Эрталаб ва кечки пайтларда сепилган гербицидларнинг фойдаси кам бўлади. Шунингдек, заарли хасва тарқаладиган ва занг касалининг ўчоқлари қўл аппаратлари ёрдамида профилактик ишловдан ўтказилади. Бу келгусида заарли хасва ва занг касаллиги кенг тарқалишининг олдини олади. Бундай чоралар жойлардаги тупроқ иқлим шароити ва ғалланинг ривожланиш фазаларига қараб 10-15 кун олдин ёки кейин ўтказилиши мумкин.

Бошокли дон етиштиришда мазкур агротехник тадбирларни ўз вақтида ва сифатли бажариш ўта муҳим ҳисобланади. Тадбирларни кечикиб бажарилиши ҳосилдорликни пасайишига олиб келади.

## Экиш мавсуми

Охирги йилларда сув ресурсларининг тобора танқис бўлиб бораётганлиги йилдан-йилга сезилмоқда. Соҳа мутахассисларининг маълумотларига кўра, жорий йилда ҳам сув ўтган йилга нисбатан 25-30 фоизга кам бўлиши кутилмоқда. Бу йилги қиши ойларининг аввалгиларга нисбатан илиқ келиши, ёғингарчилик меъёрга нисбатан кам бўлганлиги ушбу башоратни маълум даражада тўғри эканлигини исботламоқда. Шуни инобатга олиб, чигитни

ўз намига ундириб олиш жорий мавсумда жуда катта аҳамиятга эга бўлган тадбир хисобланади.

Аввало экиш мавсумини қатъий режалаштириб олиш лозим. Чигитни экишга тайёрлаб, ерлар тобга келиши билан биринчи навбатда сув таъминоти оғир бўлган худудлар ва фермер хўжаликлари майдонлари аниқлаб олинади. Мавжуд техник ресурслар шу худудларга жамланиб, отряд усулида ишлатган ҳолда жуда қисқа муддатда ерни тайёрлаб, чигит экиб, уни ўз намига ундириб олишга эришиш лозим.

### **Ерларни чигит экишга тайёрлаш**

Эрта баҳорги бороналаш муддати тупроқнинг механик таркибига, об-ҳаво шароитига ва тупроқни етилишига қараб белгиланади: ёғингарчиликкам бўладиган, сув таъминоти оғир бўлган худудларда эрта баҳорги бороналаш февраль ойининг охирлари ва мартнинг бошларида, бошқа худудларида мартнинг ўртаси ва учинчи ўн кунлигига ўтказилади. Эрта баҳорги бороналаш шудгорланган майдон юза қисмининг майда донадор бўлиши ҳамда тупроқ табиий намлигини узоқ муддат сақлаб туришга имкон яратади. Эрта баҳорги бороналаш бир марта, айрим ҳолларда ер бети қаттиқ қатқалоқ бўлиб қолганда иккинчи марта ўтказиш мумкин. Яхоб суви берилган, айниқса, шўри ювилган майдонларда ҳайдов қатлами анча зичлашган бўлса, уларни бороналаш самарасиз бўлиши мумкин. Бундай тупроқлар борона тиркалган ҳолда чизилланади ёки дискаланади. Тупроққа эрта баҳорги ишлов беришда тишли ва дискли бороналар ҳамда чизель-культиваторлардан танлаб ва тўғри фойдаланиш, тупроқнинг ҳайдов қатламини зичламасдан, чигитни экишга сифатли тайёрлашни таъминлайди. Сув тақчил йиллари, сув таъминоти оғир бўлган худудлар ва фермер хўжаликлари майдонларида тишли (шихмола) бороналаш тавсия этилмайди. Чунки бу тадбир ердаги табиий намликни буғланиб кетишига сабаб бўлиши мумкин.

### **Экиш олдидан тупроққа ишлов бериш**

Бу тадбир бевосита экишдан 5-10 кун олдин ўтказилади. Тупроқнинг ҳолатига қараб қўйидаги тадбирлар амалга оширилади: шўрланмаган, бегона ўтлардан нисбатан тоза майдонлар бир вақтни ўзида мола тиркаб бороналанади. Бегона ўтлардан тоза майдонларни экиш олдидан текислагич агрегатлар ёки мола ёрдамида текислаш кифоя.



Юқори даражада бегона ўт босган майдонларда чизель-культиваторларга тиркалган бороналар воситасида кўп йиллик бегона ўтларнинг илдизи даладан тозалаб чиқарилади. Юзада қолган илдизлар эса қўлда терилиб, ёқиб юборилади. Бегона ўтлар билан ўртача ва кам заарланган ерларда бороналаш билан ҳам уларни йўқотиш мумкин. Кейин экиш олдидан мола босилади.

Экиш олди ишлари ва чигит экиш мавсумини қисқа (7-10 кун) муддатда, сифатли ўтказиш чораларини кўриш лозим.

### **Чигитни экишга тайёрлаш**

Унувчанлиги 90-95 фоиздан кам бўлмаган уруғлик чигит экилгани маъқул. Чигитни намлашга катта ахамият бериш керак. Бу тадбир табақалаш йўли билан ўтказилади. Экиш муддатига қараб бир тонна уруғни намлаш учун 600 литргача сув сарфланади. Чигитни намлаш олдиндан тайёрланган (асфалтланган ёки бетонланган) маҳсус майдончаларда ўтказилади. Майдончаларнинг бўйи 5-6, эни 2.5-3 м ва баландлиги 30-35 см катталикларда бўлиши лозим. Чигитни намлаш вақтидаги қалинлигини 20-25 см . дан оширмаслик зарур. Намлаш уч босқичда: биринчиси 3-4, иккинчиси 4-5, учинчиси 5-6 соатда ўтказилиб, 200 литрдан сув сарфланса, чигитнинг тўлиқ ва сифатли намланишига эришилади ҳамда намлиги кам бўлган тупроқларда униб чиқишига ижобий таъсир этади. Шунингдек, ўстирувчанлик хусусиятига эга препаратлар билан намлаш, нокулай шароитдаги чигитни унувчанлигини ошириши билан бирга илдиз тизимини бакувват ривожлантиради ва тупроқнинг табиий намлигидан унумлироқ фойдаланилади.

Намланган чигитнинг сақлаш муддати 12 соатдан ошмаслиги керак. Энг қулай муддатда ёки кечикиб экиладиган жойларда чигитни узоги билан 18 соат сақлаш мумкин, холос. Чигитни намлашда бир кунда қанча майдонга экиш, далага олиб бориш ва бошқа ишларга кетадиган вақт ҳисобга олиниши мақсадга мувофиқдир.

### **Чигит экиш**

Чигит экиш ишлари тупроқнинг 0-10 см чуқурликдаги ўртача ҳароратига қараб бошланади. Тукли чигит экиш учун тупроқнинг ўртача ҳарорати 12-14 градус, туксизлантирилган чигит экиш учун 14-15 градус атрофида бўлиши лозим. Тажрибали дехқонлар тупроқнинг экиш учун етилганлигини қўйидаги оддий усул ёрдамида аникладилар: чигит экиладиган дала тупроғини қўлда сикимлаб, ташлаб юборилганда майда ҳолда сочилиб кетиши керак.

Чигит экишни биринчи навбатда тез қизийдиган енгил, ўртача қумоқ ва тез етиладиган майдонларда, кейин эса оғир тупроқли тоғ олди минтақаларида ўтказиш мақсадга мувофиқдир. Тупроқ ҳарорати бундан паст бўлганда экилган бир қисм чигит чириб кетади ва ниҳоллар сийрак ўсиб чиқади



Чигит механик таркиби оғир, секин қизийдиган тупроқларда 3-4 см, бошқа тупроқларда 4-5 см чуқурликка әкилади. Экиш түлиқ тугалланган, деб ҳисобланиши учун далалар чети, симёгоч столбалари ва ўқ ариқлар атрофи күлдә әкилган бўлиши керак. Шундагина барча майдонларда түлиқ гектар ҳосил қилинади.

Чигит экиш меъёрига алоҳида аҳамият бериш даркор. Тукли чигитлар гектарига 40-45 кг әкилганда, далада мақбул кўчат қалинлиги таъминланади. Туксизлантирилган чигитларни гектарига 20-25 кг меъёрида сарфлаб, намламасдан, тупроқ ҳарорати 14 градус бўлганда киришилади.

Маълумки, чигит униб чиққунга қадар далада бегона ўтлар кўпаяди. Уларга қарши чигитни экиш баробарида гербицид эритмаларини сепиш яхши натижга беради. Бунда “Стомп” гербицидини гектарига 0,8-1,0 кг меъёрида сепиш мақсадга мувофиқ бўлади.



Чигит экишни мақбул муддатларда агротехник талабларга риоя қилган ҳолда ўтказиш чигитни тупроқдаги нам ҳисобига ундириб олишни ва пахта майдонларида тўлиқ ниҳоллар ҳосил этилишини таъминлайди. Чигит экиш даврида тупроқнинг чекланган намлик сифими 60 фоиздан кам бўлмаслиги керак. Бундай намликда экилган чигитни тупроқнинг табиий намлигига ундириб олишга эришилади. Кегусида пахтадан эртаки ва мўл ҳосил олиниши таъминланади.